

A dì 20. Da poi disnar fo colegio di la Signoria et savij. Et vene il signor Bortolo d'Alviano, questa matina zonto, et referi con li capi di X quanto havia operato in vicentina e veronese, e l'opinion sua di l'exercito, et come si habbi a governar il campo, e disse di Mantova. Et poi andò, con il Corner e Griti, provedadori zenerali electi, et savij dil consejo, a l'arsenal, a veder certe artilarie bisogna per campo. Vi andò *etiam* sier Polo Capello, el cavalier, è sopra le artilarie. Et fo ordinato in colegio, che li provedadori vadino via sabado et si meteno a hordine.

Et ozi, a hore 22 e più, sier Domenego Morexini, procurator di San Marco, di età anni 91, naque dil 17, el più vecchio zentilomo di Venexia, hessendo stato eri im pregadi fin una hora di note, et vene zoso con pocho di grizolo di febre, et non parlava. Or ozi, a hore . . . , dimandò la comunione; et cussì come un pavarò, a hore 4 di note *expiravit*. Andava con un mantello paonazo e uno becho di scarlato vecchio et una cintura di cuoro; e mai faliva pregadi nè consejo di X, e pochi mexi è parlò in renga im pregadi, montato dove si leze le letere, ma da do mexi in qua era venuto tanto vecchio, che poco parlava. Era gran richo, lassò facultà per ducati 80 milia, contadi 20 milia e più; et non havia fato testamento, compito come dirò *etc.*

In questa matina vene Zuan Gobo, corier, stato in Alemagna a Yspruch e più in suso, mandato per Zuan Mechini, fator di Focher, e per lui si ave certa bona nova di Elemagna, non so che, *ita* si spera di bene.

11 A dì 21. La matina l'orator yspano a bona horra fo in colegio. Et vene poi il signor Bortolo d'Alviano, e consultato di quanto si ha a far. Et diman partirà per Pordenom, poi anderà im brexana over Geradada. E si redurà le zente im hordine, che pur si ha avisi començar a zonzer zente di qua da' monti et a Milan *etc.*

Vene letere di Roma, di 17, dil Badoer, e dil Pixani, di Civita Vecchia. Come il papa a dì 21 saria a Roma *etc.*, come poi, sapendo, scriverò il sumario.

Da poi disnar fo gran consejo, *licet* fusse zuoba, secondo la parte dil consejo di X, per far procurator. Et vene a consejo l'orator yspano, domino Bortolo Ferre, et il signor Bortolo d'Alviano, per amor di sier Zorzi Corner, per esser stato con lui provedador in campo a l'aquisto di Goricia et Trieste. Et fato electione, veneno a consejo 3 fioli dil serenissimo, manchava sier Lorenzo, che non volse venir, et andono a capello. Et fono nominati 17, uno era

debitor; et poi rimase sier Zorzi Corner, el cavalier, come qui soto aparerà. Et nota, eramo a quella balotatim, cazadi li quatro, 1535. Et fo portato la nova al Venier, che era in colegio a consultar, che l'era rimaso, dove era *etiam* il Corner e li altri savij dil colegio, e li fo tochato la man. Poi vene la nova vera al Corner; sì che fu mal, e fino a caxa dil Venier andò tal nova falssa, processa da certo Trifom, che fo causa di tal eror. Or, compito di balotar il Corner, il signor Bortolo da tanta alegreza volse venir zoso di consejo e andar a trovarlo; et l'orator yspano restò fino al compir dil consejo.

Nominati procurator di San Marco sopra le comissarie di qua da Canal, in luogo di sier Domenego Morexini, a chi Dio perdoni.

Sier Francesco Bernardo, fo consier, <i>quondam</i> sier Pollo, procurator	395.1301
Sier Andrea Loredan, fo luogotenente in la Patria di Friul, <i>quondam</i> sier Nicolò	287.1388
Sier Alvixe da Molin, fo podestà a Padoa, <i>quondam</i> sier Nicolò	519.1177
Sier Marco Bolani, fo podestà a Padoa, <i>quondam</i> sier Bernardo	418.1287
† Sier Andrea Griti, fo podestà a Padoa, <i>quondam</i> sier Francesco	875. 837
Sier Pollo Pixani, el cavalier, fo capitano a Padoa, <i>quondam</i> sier Luca	530.1166
Sier Antonio Loredan, el cavalier, fo savio dil consejo, <i>quondam</i> sier Lorenzo	437.1239
Sier Stefano Contarini, fo consier, <i>quondam</i> sier Bernardo	364.1278
Sier Marco da Molin, fo consier, <i>quondam</i> sier Pollo	349.1344
Sier Lorenzo di Prioli, fo consier, <i>quondam</i> sier Piero, procurator	380.1292
† Sier Andrea Venier, fo capitano a Padoa, <i>quondam</i> sier Liom	936. 742
† Sier Zorzi Corner, el cavalier, fo podestà a Padoa, <i>quondam</i> sier Marco, cavalier	933. 763
Sier Pollo Antonio Miani, fo consier, <i>quondam</i> sier Giacomo	363.1336
† Sier Piero Balbi, fo capitano a Padoa, <i>quondam</i> sier Alvise	747. 939